



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 660, Datë 21.11.2019

“Për dhënien e disa rekomandimeve lidhur me procedurat e caktimit të ekspertëve për vlerësimin e dëmeve në sigurime, në procedurat gjyqësore”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 21.11.2019, shqyrtoi çështjen me:

Objekti: Për dhënien e disa rekomandimeve lidhur me procedurat e caktimit të ekspertëve për vlerësimin e dëmeve në sigurime, në procedurat gjyqësore;

Baza Ligjore: Neni 24, shkronja (d), (f) , neni 29/1 dhe nenin 69 dhe 70 i Ligjit Nr. 9121, datë 28.07.2003 “Për Mbrojtjen e Konkurrencës”,

Komisioni i Konkurrencës, pas shqyrtimit të:

- Relacionit të Sekretarit të Përgjithshëm të Autoritetit të Konkurrencës;

VËREN SE :

1. Pranë Autoritetit të Konkurrencës, është depozituar ankesa me nr. 340 Prot., datë 28.05.2019, ku ankuesi është ekspert vlerësues dëmi në sigurime, i licencuar nga Autoriteti i Mbikëqyrjes Financiare dhe pjesë e listës që disponon gjykata për përzgjedhjen e ekspertëve.
2. Sipas ankuesit, në gjykatë janë rreth 40 ekspertë të pavarur që realizojnë ekspertime në lidhje me vlerësimet e dëmeve dhe nga gjykata thërriten vetëm pak prej këtyre ekspertëve dhe shumica e ekspertëve edhe pse paguajnë detyrime, taksa dhe tatime nuk thërriten si ekspertë nga gjykata. Sipas ankuesit në Gjykatën e Tiranës janë rreth 60 çështje në muaj dhe ankuesi pretendon se personalisht që nga Prilli 2016 e deri sot është caktuar

- vetëm në 2 prej tyre ndërkohë që duhet të ishte caktuar sipas tij në 24 çështje.
3. Në nenet 224 e në vijim të Kodit të Procedurave Civile parashikohet mënyra se si zgjidhet eksperti dhe përgjegjësitë e tij. Në nenin 225, pika 1 të K.Pr.C shprehimisht thuhet se caktimi i ekspertit bëhet nga Gjykata.
 4. Kodi i Procedurës Civile ka parashikuar se ekspertët përzgjidhen nga një regjistër elektronik i personave të licencuar, i cili administrohet dhe publikohet nga Ministria e Drejtësisë.
 5. Në Udhëzimin nr. 1, datë 6.3.2019 “*“Për disa ndryshime dhe shtesa në Udhëzimin nr. 4, datë 12.12.201 të Këshillit të Ministrave, “Për caktimin e masës së shpenzimeve dhe pagesave të ekspertëve dhe dëshmitarëve gjatë procesit gjyqësor”*”, është parashikuar se përzgjedhja e ekspertëve bëhet mbështetur në të dhënat e Regjistrit Elektronik të Ekspertëve, regjistër që e vë në dispozicion Ministria e Drejtësisë. Gjykata, bën përzgjedhjen e ekspertëve në mënyrë të drejtë dhe transparente, duke konsideruar që çdo ekspert nuk mund të caktohet për të ofruar ekspertizën e tij më shumë se 30% të numrit të çështjeve gjyqësore për të cilat është kërkuar e njëjta lloj ekspertizë brenda një viti kalendarik. Kjo për arsye që të sigurojë një nivel transparence të përshtatshme lidhur me përzgjedhjen e ekspertëve nëpërmjet mjeteve elektronike.
 6. Bazuar në nenin 226 të Ligjit nr.52/2014 “*Për veprimtarinë e sigurimit dhe risigurimit*”, institucioni kompetent për licencimin e vlerësuesve të dëmeve në sigurimeve është Autoriteti i Mbikëqyrjes Financiare. Vlerësuesit e dëmeve të licencuar, sipas pikës 4 të këtij neni, regjistrohen në regjistrin përkatës, i cili mbahet nga ky Autoritet.
 7. Autoriteti i Konkurrencës i është drejtuar me shkresën nr. 340/1 Prot., datë 08.07.2019 “*Kërkim informacioni*”, Gjykatës së Rrethit Gjyqësor Tiranë, Gjykatës së Apelit Tiranë, Gjykatës Administrative të Shkallës së Parë Tiranë, Gjykatës Administrative të Apelit Tiranë, duke kërkuar informacion lidhur me numrin total të procedurave gjyqësore për të cilat është kërkuar ekspert për vlerësimin e dëmeve në sigurime, ekspertët e caktuar nga gjykata dhe listën e ekspertëve që përdor gjykata.
 8. Gjykata e Rrethit Gjyqësor Tiranë me shkresën nr. 340/5 Prot të AK, datë 19.07.2019 “*Kthim përgjigje shkresës nr.340/1, datë 08.07.2019*” na bën me dije se përsa i përket mënyrë së përzgjedhjes së ekspertëve është kompetencë e trupës gjyqësore dhe nuk ka një referim të caktuar ligjor.
 9. Gjykata Administrative e Apelit, me shkresën nr 340/4, datë 18.07.2019 “*Kthim përgjigje*” na bën me dije se përgjatë vitit 2018 dhe deri në ditët e sotme 2019 nuk është gjykuar asnjë çështje gjyqësore për vlerësimin e dëmeve në sigurime nga kjo gjykatë.
 10. Ministria e Drejtësisë është përgjigjur me shkresën nr. 340/3 Prot., datë 17.07.2019 “*Kthim përgjigje shkresës suaj me nr. 340/2 Prot., datë 08.07.2019*”, se Ministria e Drejtësisë bazuar në nenin 224/d të Kodit të Procedurës Civile dhe Udhëzimit të Ministrit të Drejtësisë nr.10619, datë 19.10.2018 “*Për krijimin, Administrimin dhe Vënien në Dispozicion për*

Publikun të Regjistrimit Elektronik për Ekspertët”, është institucioni që krijon, administron dhe vë në dispozicion për publikun një Regjistër Elektronik për Ekspertët. Ky regjistër ndahet në seksione të ndryshme, duke grupuar ekspertët sipas fushave të tyre të ekspertizës dhe vendit ku punojnë. Në përfundim të këtij procesi regjistri elektronik i ekspertëve do të publikohet në faqen zyrtare të Ministrisë së Drejtësisë.

11. Autoriteti i Konkurrencës, me shkresë nr.340/9 Prot., datë 01.10.2019 *“Kërkim informacioni”*, i është drejtuar Gjykatave të Rretheve Gjyqësore të Republikës së Shqipërisë, duke kërkuar informacion lidhur me numrin total të procedurave gjyqësore për të cilat është kërkuar ekspert për vlerësimin e dëmeve në sigurime, listën e ekspertëve mbi të cilën bazohet gjykata në caktimin e ekspertëve për vlerësimin e dëmeve në sigurime si dhe informacion statistikor lidhur me numrin e çështjeve për çdo ekspert në këtë fushë.
12. Nga sa më lart konstatohet se Gjykatat theksojnë faktin se caktimi i ekspertit është në diskrecionin e gjykatësit, i cili e zgjedh ekspertin bazuar në dispozitat e Kodit të Procedurës Civile.
13. Vihet re se Gjykatat i referohen listës së ekspertëve të miratuar nga AMF dhe se ka një shpërndarje të rasteve të shqyrtimit lidhur me dëmet në sigurime, duke pasur parasysh edhe numrin e kufizuar të rasteve nëpër rrethe.
14. Evidentohet fakti se është Ministria e Drejtësisë, e cila krijon regjistrin elektronik të ekspertëve. Me Udhëzimin Nr. 10619, datë 19.10.2018 *“Për krijimin, administrimin dhe vënien në dispozicion për publikun të Regjistrimit Elektronik për Ekspertët”*, Ministria e Drejtësisë krijon, administron dhe publikon Regjistrin Elektronik për Ekspertët, i cili mbahet në format elektronik dhe ndahet në seksione, duke i grupuar ekspertët sipas fushës së tyre të ekspertizës dhe vendit ku ata punojnë, referuar juridiksionit territorial të rretheve gjyqësore.
15. Në pikën 33 të këtij Udhëzimi është përcaktuar një afat 4 muaj brenda të cilit Grupi i Punës së bashku me sekretariatën teknik ndjekin procedurat e nevojshme të përcaktuara në udhëzim.

PËR KËTO ARSYE:

Komisioni i Konkurrencës, bazuar në nenin 24, shkronja (d) (f), nenin 29/1, nenin 69 dhe 70 të Ligjit Nr. 9121, datë 28.07.2003 *“Për Mbrojtjen e Konkurrencës”*, i ndryshuar,

VENDOSI:

1. T’i rekomandojë Ministrisë së Drejtësisë krijimin, administrimin dhe publikimin e Regjistrimit Elektronik për Ekspertët vlerësues të dëmeve në sigurime, brenda 90 ditëve nga hyrja në fuqi e këtij vendimi.

2. Me krijimin e Regjistrimit Elektronik të Ekspertëve, Ministria e Drejtësisë njofton edhe Autoritetin e Konkurrencës.
3. Ngarkohet Sekretari i Përgjithshëm për njoftimin dhe ndjekjen e zbatimit të këtij vendimi.

Ky vendim hyn në fuqi menjëherë.

KOMISIONI I KONKURRENCËS